

AKASHVANI (AIR)
RNU : KOLKATA
Bengali Text Bulletin

Date 10-05-2025

Time: 7.50 P.M.

বিশেষ বিশেষ খবরঃ-

১) ভারত ও পাকিস্তানের মধ্যে সংঘর্ষ বিরতি।

স্থল, জল এবং আকাশ তিন ক্ষেত্রেই সামরিক অভিযান স্থগিত রাখবে দু দেশ।

আগামী ১২ ই মে দুদেশের মধ্যে ডিজিএমও পর্যায়ে ফের বৈঠক।

২) পাকিস্তানের মসজিদগুলি লক্ষ্য করে হামলা চালানো হয়েছে বলে ইসলামাবাদের অভিযোগ খারিজ করে দিয়েছে বায়ু সেনা। বিমান বাহিনীর পক্ষ থেকে জানানো হয়েছে, ধর্ম নিরপেক্ষ ভারত এই ধরনের আক্রমণ চালায় না। ভারত পাকিস্তানের জঙ্গী ঘাঁটি লক্ষ্য করেই অভিযান চালিয়েছে।

৩) বিদেশমন্ত্রী এস জয়শঙ্কর বলেছেন, ভারত সবসময় সব ধরনের সন্ত্রাসবাদের বিরুদ্ধে কঠোর ও আপোষহীন মনোভাব বজায় রেখেছে। ভবিষ্যতেও একই ধরনের দৃষ্টিভঙ্গী বজায় থাকবে।

৪) নিত্যযাত্রীদের জন্য বাস পরিষেবা সহজলভ্য করতে যাত্রীসার্থী অ্যাপে বিশেষ ব্যবস্থা।

৫) কলকাতা সহ দক্ষিণবঙ্গের বিভিন্ন জেলায় তাপপ্রবাহের পূর্বাভাস।

ভারত ও পাকিস্তান চলতি সামরিক অভিযান এবং সংঘর্ষ অবিলম্বে স্থগিত রাখার ব্যাপারে সম্মত হয়েছে। আজ নতুন দিল্লীতে এক প্রেস ব্রিফিং-এ বিদেশ সচিব বিক্রম মিশ্রি এই ঘোষণা করে জানান বিকেল ৫ টা থেকে ঐ সংঘর্ষ বিরতি কার্যকর হয়েছে। তিনি বলেন, সংঘর্ষ বিরতি নিয়ে পাকিস্তানের সামরিক অভিযান বিষয়ক মহানির্দেশক ডিজিএমও ভারতের ডিজিএমওকে ফোন করেন। আলোচনাতে স্থির হয়েছে যে, দু পক্ষই স্থল, জল এবং আকাশ তিন ক্ষেত্রেই সামরিক অভিযান স্থগিত রাখবে। সেই মত দুপক্ষই সশস্ত্র বাহিনীকে প্রয়োজনীয় নির্দেশ দিয়েছে। আগামী ১২ ই মে দুদেশের মধ্যে ডিজিএমও পর্যায়ে পর্যালোচনা বৈঠক হবে।

অপারেশন সিন্দুর-এ ভারতের সশস্ত্র বাহিনী পাকিস্তানের আক্রমণ এবং প্রতিরক্ষা দুই ব্যবস্থাকেই পর্যুদস্ত করে দিয়েছে বলে ভারতীয় সামরিক বাহিনীর তরফে জানানো হয়েছে। আজ বিদেশ সচিবের প্রেস ব্রিফিং-এর পরই সশস্ত্র বাহিনীর তরফে এক সাংবাদিক সম্মেলন করা হয়। ভারতীয় সেনার তরফে কর্নেল সুফিয়া কুরেশী বলেন, ভারতীয় সেনা মূলত জঙ্গী শিবির এবং প্রশিক্ষণ কেন্দ্রগুলি লক্ষ্য করে আক্রমণ চালিয়েছে। ভারত বিরোধী কার্যকলাপ ঐ শিবিরগুলি থেকে চালানো হচ্ছিল বলে তিনি জানান। কোনোরকম ধর্মীয় স্থানকে নিশানা করা হয়নি বলেও তিনি জানান।

বাইট

পাকিস্তানের তরফে ভারতের এস ফোর হান্ড্রেড এবং ব্রাম্বোস ক্ষেপনাস্ত্র কেন্দ্র ধ্বংস করে দেওয়া হয়েছে বলে যে দাবি করা হয়েছিল, তা সম্পূর্ণ মিথ্যা বলেও কর্নেল কুরেশি জানান। পাশাপাশি সিরসা, জম্মু, পাঠানকোট, ভাতিভা, নালিয়া এবং ভুজে ভারতীয় বায়ু সেনার ঘাঁটির ক্ষতি করা নিয়েও পাকিস্তান মিথ্যা প্রচার চালিয়েছে বলে তিনি জানান। সাংবাদিক বৈঠকে বায়ু সেনার উইং কমান্ডার ভ্যোমিকা সিং বলেন, ভারত

যেগেতু ধর্ম নিরপেক্ষ দেশ তাই ভারতীয় সেনা পাকিস্তানের মসজিদ গুলি লক্ষ্য করে হামলা চালিয়েছে, সেই দাবিও সম্পূর্ণ মিথ্যা।

বিদেশ মন্ত্রী ডক্টর এস জয়শঙ্করও বলেছেন যে, দুই দেশ সংঘর্ষ বিরতির ব্যাপারে সহমতে পৌঁছেছে। এক সোশ্যাল মিডিয়া পোস্টে তিনি জানিয়েছেন, ভারত সবসময় সব ধরনের সন্ত্রাসবাদের বিরুদ্ধে কঠোর ও আপোষহীন মনোভাব বজায় রেখেছে। ভবিষ্যতেও ভারত একই ধরনের দৃষ্টিভঙ্গী বজায় রাখবে।

ভবিষ্যতে যে কোন রকমের সন্ত্রাসবাদী কার্যকলাপকে যুদ্ধের সমতুল্য বলে গন্য করা হবে বলে ভারত আজ জানিয়েছে। এই ধরনের সকল প্রয়াসের উপযুক্ত জবাব দেওয়া হবে বলেও স্পষ্ট জানিয়ে দেওয়া হয়েছে। টানা কয়েকদিন সংঘর্ষের পর দু দেশের মধ্যে আলোচনায় পাকিস্তান অবশেষে মাথা নত করতে বাধ্য হয়েছে।

ভারত ও পাকিস্তানের মধ্যে যুদ্ধবিরতির ঘোষণার পর প্রধানমন্ত্রী নরেন্দ্র মোদীর নেতৃত্ব এবং ভারতীয় সশস্ত্র বাহিনীর সাহসিকতার ভূয়সী প্রশংসা করল বিজেপি। বিজেপির আইটি সেলের প্রধান অমিত মালব্য এক বিবৃতিতে বলেন, “প্রধানমন্ত্রী মোদী এবং সাহসী ভারতীয় সেনাবাহিনীর প্রতি হৃদয় থেকে কৃতজ্ঞতা জানাই তাঁদের অটল সংকল্প এবং সাহসের জন্য।

প্রদেশ কংগ্রেস সভাপতি শুভঙ্কর সরকার বলেছেন, দেশবাসী সকলেই শান্তির পক্ষে। তবে কেউ দেশের নিরীহ মানুষদের নিশানা করে আক্রমণ করলে ভারত তার প্রত্যাঘাত করবে।

জনসচেতনতামূলক অনুষ্ঠান ছাড়া অন্য কোনও অনুষ্ঠানে সিভিল ডিফেন্স এয়ার রেইড সাইরেনের শব্দ ব্যবহার না করার জন্য সরকার সমস্ত সংবাদমাধ্যমকে পরামর্শ দিয়েছে। আজ স্বরাষ্ট্র মন্ত্রকের এক বিবৃতিতে বলা হয়েছে, নিয়মিতভাবে সাইরেনের ব্যবহার করা হলে এ বিষয়ে নাগরিকদের সংবেদনশীলতা কমে যেতে পারে। প্রকৃত বিমান হামলার সময়ে এই সাইরেনকে নাগরিকরা সাধারণ বিষয় বলে ভুল বুঝতে পারেন।

কাশ্মীর সীমান্তে ভারত পাকিস্তান উভয় পক্ষের সামরিক অভিযান বন্ধ হলেও ভারতীয় সেনাবাহিনী ও নাগরিক সকলকেই সতর্ক থাকতে হবে বলে মত প্রকাশ করেছেন প্রাক্তন বায়ু সেনাকর্তা বিশিষ্ট লেখক ও প্রতিরক্ষা বিশেষজ্ঞ শ্যামল ভট্টাচার্য্য। আকাশবাণী কে আজ তিনি বলেন, ভারত যুদ্ধ চায়না

বাইট

সীমান্তবর্তী এলাকায় প্রয়োজনীয় পণ্য ও খাদ্য সরবরাহের ঘাটতি সম্পর্কে বিভ্রান্তিকর গুজব ছড়ানো হচ্ছে বলে বিজেপি অভিযোগ করেছে। দলের রাজ্য সভাপতি তথা কেন্দ্রীয় মন্ত্রী সুকান্ত মজুমদার এক্স হ্যাণ্ডেলে এই ধরনের অসত্য প্রচারে কান না

দেওয়ার জন্য সবার কাছে আবেদন জানিয়েছেন। তিনি বলেন, দেশে যথেষ্ট পরিমাণে খাদ্য ও প্রয়োজনীয় পণ্যের মজুদ রয়েছে এবং সরকারের সরবরাহ ব্যবস্থা পুরোপুরি সক্রিয়। তাই অযথা আতঙ্কিত হওয়ার বা জিনিসপত্র মজুত করার কোনও প্রয়োজন নেই বলেও তিনি জানান।

ভারত-পাক সীমান্তে উত্তেজনার পরিস্থিতিতে কোচবিহার জেলার দিনহাটায়, মহকুমা প্রশাসনের পক্ষ থেকে সতর্কতামূলক ব্যবস্থা হিসাবে ১৬৩ ধারা জারি করা হয়েছে। এক নির্দেশিকায় জানানো হয়েছে, যে, আগামী ৩০শে জুন পর্যন্ত, আন্তর্জাতিক সীমান্ত থেকে ১ কিলোমিটার এলাকায় রাত ৯টা থেকে সকাল ৬টা পর্যন্ত ১৬৩ ধারা জারি থাকবে। এছাড়াও সীমান্ত থেকে ৫০০ মিটারের মধ্যে সন্ধ্যা ৬টা থেকে সকাল ৬টা পর্যন্ত এই নির্দেশ কার্যকর থাকবে।

নিত্যযাত্রীদের জন্য বাস পরিষেবা সহজলভ্য করতে রাজ্য সরকার যাত্রীসার্থী অ্যাপে Where is my bus নামে একটি বিশেষ পরিষেবা চালু করেছে। পরিবহন মন্ত্রী স্নেহাশিস চক্রবর্তী আজ রাজ্য পরিবহন নিগমের সল্টলেক ডিপোতে এক অনুষ্ঠানে এই পরিষেবার সূচনা করেন। এর মাধ্যমে যাত্রীরা বাস কোথায় আছে এবং কতক্ষণে তা স্টপেজে পৌঁছবে, সেই বিষয়ে জানতে পারবেন। অনলাইনে মেটানো যাবে বাসের ভাড়াও। পাশাপাশি যাত্রী নিরাপত্তায় বেসরকারি বাস চালানোর ওপরেও নজরদারি এই অ্যাপের মাধ্যমে করা যাবে বলে মন্ত্রী জানান। আপাতত ১৬ টি রুটের ৬০ টি বাস এই পরিষেবায় যুক্ত হচ্ছে।

রাজ্য সরকার ৯০০-রও বেশি ড্রাইভার ও কনডাক্টর নিয়োগ প্রক্রিয়া চালাচ্ছে বলে মন্ত্রী মেহাশিস চক্রবর্তী জানান। নিয়োগ সম্পন্ন হলে কয়েকশো নতুন সরকারি বাস রাস্তায় নামবে।

বাইট

রাজ্য মাদ্রাসা পরিচালন কমিটির দ্বারা নিযুক্ত শিক্ষক ও অশিক্ষক কর্মীদের আগামী দু সপ্তাহের মধ্যে বেতন দেবার নির্দেশ দিয়েছে সুপ্রিম কোর্ট। ২০১৬ থেকে পরবর্তী চার বছরে মাদ্রাসা পরিচালন কমিটি বহু শিক্ষক ও অশিক্ষক কর্মী নিয়োগ করে। এতে আপত্তি জানায় রাজ্য। এরপরই শীর্ষ আদালতের দ্বারস্থ হলে সুপ্রিম কোর্ট জানিয়েছে, ২০২০ সালে ৬-ই জানুয়ারীর আগে নিযুক্ত শিক্ষক ও শিক্ষা কর্মীদের বেতন দিতে হবে। এই রায়ের সুবাদে প্রায় ৩-শো জন আপাতত বেতন পাবেন বলে আশা করা হচ্ছে।

শান্তিনিকেতনের সোনারুড়িতে নিত্যদিনের হাট সেখানকার স্বাভাবিক পরিবেশ নষ্ট করে দিচ্ছে। এই অভিযোগে দায়ের করা একটি মামলায় জাতীয় পরিবেশ আদালত চার সপ্তাহের মধ্যে রাজ্য সরকার ও দূষণ নিয়ন্ত্রণ পর্যদের বক্তব্য জানতে চেয়েছে। পরিবেশ কর্মী সুভাষ দত্ত এই মামলা দায়ের করে বলেন, স্থানীয় পঞ্চায়েত ও জেলা প্রসাসনের সম্মতি ছাড়াই সোনারুড়িতে প্রাকৃতিক পরিবেশ নষ্ট হচ্ছে। আগে সপ্তাহান্তে শুধুমাত্র শনিবার স্থানীয় মানুষজনের তৈরি বিভিন্ন শিল্প সামগ্রী এই সোনারুড়ি হাটে বিক্রি করা হত। কিবন্তু এখন সেখানে প্রতিদিনই হাট বসায় প্লাস্টিক সহ বিপজ্জনক বর্জ্য ফেলা হচ্ছে। ফলে দূষিত হচ্ছে বায়ু। ক্ষতিগ্রস্ত হচ্ছে পরিবেশ।

নানা অনুষ্ঠানের মধ্য দিয়ে আজ ব্রতচারী আন্দোলনের প্রতিষ্ঠাতা গুরুসদয় দত্ত র ১৪৩ তম জন্মবার্ষিকী পালিত হচ্ছে। শরীর চর্চা ,সত্য নিষ্ঠা, অধ্যবসায় ,সংযম ও ,মাতৃভাষার প্রতি ভালবাসাকে পাথেয় করে তার ঐকান্তিক উদ্যোগে ব্রতচারী আন্দোলন, সেই সময় জনজীবনে বিপুল উৎসাহের সঞ্চার ঘটিয়েছিল। লোকসাহিত্য গবেষণা, লেখক, গ্রন্থকার হিসেবেও তার পরিচিতি ছিল।তৎকালীন পল্লী উন্নয়ন ও সমাজ সেবার কাজও করেছেন গুরুসদয় দত্ত।

ব্রিটিশ শাসিত পরাধীন ভারতে উচ্চপদস্থ আমলা হিসেবে কাজ করলেও তৎকালীন ব্রিটিশ শাসনের অনৈতিক নির্দেশের বিরুদ্ধে তিনি সরব হয়েছিলেন।

কলকাতা সহ দক্ষিণবঙ্গের বেশকিছু জেলায় আগামী তিন চার দিন তাপপ্রবাহ ও অস্বস্তিকর আবহাওয়া বজায় থাকবে। তবে অনুকূল বায়ু প্রবাহ থাকার দরুন কিছু কিছু জায়গায় বিক্ষিপ্তভাবে বৃষ্টির সম্ভাবনা রয়েছে। ঝাড়গ্রাম, বীরভূম, বাঁকুড়া পুরুলিয়ার মতো জেলা গুলিতে তাপমাত্রা কোথাও কোথাও চল্লিশ ডিগ্রি ছাড়িয়ে যেতে পারে। তবে উত্তরবঙ্গের দার্জিলিং, জলপাইগুড়ি, কোচবিহার ও আলিপুরদুয়ার জেলায় বজ্রবিদ্যুৎ সহ ভারী বৃষ্টির সম্ভাবনা রয়েছে।
